

წინასიტყვაობა

ძვირფასო მკითხველო,

გერმანულ-ქართულმა სისხლის სამართლის ჟურნალმა (DGStZ) უკვე დაიმკვიდრა ადგილი გერმანულ-ქართული სამართლის განვითარების ფარგლებში და მოხარული ვართ, რომ თქვენთან ერთად წარმატებული თანამშრომლობის მეცხრე წელს ვაგრძელებთ.

ჟურნალის ეს გამოცემა ისე, როგორც მისი მომდევნო გამოცემა, განსაკუთრებული მადლიერებით ეძღვნება მის ერთ-ერთ გამომცემელს, პროფესორს, სამართლის დოქტორს, საქართველოს საკონსტიტუციო სასამართლოს თავმჯდომარეს მერაბ ტურავას. 2024 წლის 23 სექტემბერს მერაბ ტურავას 60 წელი შეუსრულდა.

მერაბ ტურავა ჩვენი ჟურნალის ერთ-ერთი გამორჩეული გამომცემელია, რომლის, როგორც სამეცნიერო და პედაგოგიურ, ისე სამოსამართლო საქმიანობას განსაკუთრებული წვლილი აქვს შეტანილი ქართული სისხლის სამართლის განვითარებაში. მის სახელს უკავშირდება ქართული სისხლის სამართლის დოგმატიკაში დანაშაულის სამსაფეხურიანი სისტემისა და მისი გამოვლინებების სიღრმისეული გამოკვლევა და შედეგად, ამ სისტემის ცალკეულ ნიშნებთან დაკავშირებით ახალი მიდგომების ჩამოყალიბება. მერაბ ტურავას სამეცნიერო მიღწევებს საფუძვლად უდევს ქართული და გერმანული სისხლის სამართლის სიღრმისეული ცოდნა. მან 1997 წელს წარმატებით დაიცვა დისერტაცია ბერლინის ჰუმბოლდტის უნივერსიტეტში და სწორედ მის ნაშრომში ასახულმა იდეებმა ჰპოვეს განვითარება, როგორც მის შემდგომ სამეცნიერო ნაშრომებში, ისე დღეს მოქმედ საქართველოს სისხლის სამართლის კოდექსში.

განსაკუთრებულ აღნიშვნას იმსახურებს მერაბ ტურავას დიდი ძალისხმევა საქართველოში გერმანული სისხლის სამართლის პოპულარიზაციის საქმეში და ორმხრივი – გერმანულ-ქართული – სამეცნიერო სამართლებრივი ურთიერთობების განვითარებაში. აღსანიშნავია მისი კანონშემოქმედებითი როლი დღეს მოქმედი სისხლის სამართლის კოდექსის შემუშავების დროს, როდესაც ახალ ქართულ კოდექსში გერმანული სისხლის სამართლის

მეცნიერების მიდგომები სხვა პროფესორებთან ერთად მისი აქტიური მეცადინეობით აისახა. რაც შეეხება მერაბ ტურავას უშუალო ხელმძღვანელობით სისხლის სამართლის სფეროში წარმართულ გერმანულ-ქართულ სამეცნიერო თანამშრომლობას, ის სხვადასხვა ასპექტით არის გამორჩეული. ეს თანამშრომლობა გამოიხატება, როგორც ქართველი და გერმანელი პროფესორების ერთობლივი სამეცნიერო პროექტების განხორციელებაში, ისე ახალგაზრდა მკვლევარებისა და დოქტორანტების გერმანიაში სამეცნიერო მივლინებების ხელშეწყობაში. ასეთი მჭიდრო და ნაყოფიერი თანამშრომლობის ფარგლებში, ფოლკსვაგენის ფონდის მხარდაჭერით, ქართველი და გერმანელი პროფესორებისა და დოქტორანტების მონაწილეობით, საქართველოსა და გერმანიაში, ჩატარდა ერთობლივი სამეცნიერო კოლოქვიუმები, საქართველოში პირველად გაიმართა ქართველ და გერმანელ პროფესორთა სამეცნიერო სიმპოზიუმი სისხლის სამართალში, მოგვიანებით კი, მერაბ ტურავასა და ქეთევან მჭედლიშვილი-ჰედრიხის ავტორობით გამოქვეყნდა სისხლის სამართლის ზოგადი ნაწილის სახელმძღვანელო ორ ნიგნად.

მერაბ ტურავას ბიოგრაფიას ასევე ამდიდრებს მისი განსაკუთრებულად მნიშვნელოვანი პრაქტიკული საქმიანობა; კერძოდ, იგი იყო საქართველოს უზენაესი სასამართლოს მოსამართლე და იმავდროულად სასამართლოს თავმჯდომარის მოადგილე. ბოლო წლებში კი იგი არის საქართველოს საკონსტიტუციო სასამართლოს მოსამართლე და იმავდროულად სასამართლოს თავმჯდომარე. აღსანიშნავია, რომ ორივე სასამართლოს მიერ მიღებულ გადაწყვეტილებებს და ამ გადაწყვეტილებებში განვითარებულ სამართლებრივ მსჯელობებს განსაკუთრებული წვლილი შეაქვთ ქართული (სისხლის) სამართლის განვითარებაში.

ჭემბარიტი პროფესორისთვის განსაკუთრებულად ძვირფასია მისი ცოდნის ახალგაზრდებისთვის გაზიარება და შემდგომი სამეცნიერო თაობების ჩამოყალიბებაში წვლილის შეტანა. მერაბ ტურავას სამეცნიერო მოღვაწეობას ეს ასპექტიც გა-

მოარჩევს. კერძოდ, მის სამეცნიერო საქმიანობას თანმდევ სამარკო ნიშნად გასდევს ახალგაზრდა მკვლევარების თაობის აღზრდა. გვჯერა, რომ პროფესორი მერაბ ტურავა კიდევ ბევრ თაობას აღზრდის და კიდევ მრავალი წელი აქტიურად იმუშავებს ქართული სისხლის სამართლის შემდგომ განვითარებაზე.

ამ ყველაფრის გათვალისწინებით გვსურს, მოკრძალებული ჟესტით გულითადი მადლობა გადავუხადოთ ბატონ მერაბ ტურავას დაუღალავი შრომისათვის და გვსურს, DGSStZ-ის სპეციალური გამოცემებით გამოვხატოთ მადლიერება მის მიერ სისხლის სამართლის სფეროს განვითარებაში შეტანილი განსაკუთრებული წვლილისთვის. ვიმედოვნებთ, რომ თემატურად საინტერესო საკითხები შევაგროვეთ და ამ გზით გერმანულ და ქართველ პროფესორებს შორის სისხლის სამართლის სფეროში არსებულ სამეცნიერო დისკუსიას ახალ ბიძგს მივცემთ.

გამომცემლების სახელით:

ასოცირებული პროფესორი, სამართლის დოქ.
გიორგი დგებუაძე, ასოცირებული პროფესორი,
სამართლის დოქ. ლაფრენტი მალლაკელიძე,
ასოცირებული პროფესორი, სამართლის დოქ.
ანრი ოხანაშვილი